

煮粥條議

明 華亭陳繼儒仲醇著

萬歷三十七年歲饑巡撫都御史周孔教檄知府張九德華亭知縣聶紹昌青浦知縣韓原善分往鄉村作粥以濟飢民皆取給署丞顧正心濟荒米使鄉士夫好義者監視之鄉市煮粥凡十八處余山一路余廷諤獨捐米三百石於宣妙寺煮粥就食者頗眾余因作此條議云余山道人陳繼儒識

一設粥於城郭則游手之人多設粥於鄉村則力耕之

農眾聚則疫痢易染分則道里適中宜設於城郭十

一鄉村十九較得其平矣

一委官監視不無供應之煩及左右需索不如敦請縉紳賢士爲地方信服者主之事既辦集小民呼應亦便

一搭廠既費竹木工食又防火燭風雨不如寺院之中水漿造鍋寓房貯積種種便益

一執事卽選飢民中健旺好潔者給米二升令司炊爨一糶粥不如米粥往時糶粥多不全熟或有攪和石膏

往往食後致病而死故以白米爲主米粥或以石灰入鍋易于脹熟害甚石膏尤宜檢察

一草柴不如木柴火力既盛搬載堆積亦易餘炭又可煮茶飢民待粥者卽令劈柴劈完加粥一盃

一吃粥上午一次下午一次俱自帶盃箸就食倘遇風雨道途艱難許自帶瓦器并給二次以便攜歸

一給粥老人先于童壯婦人先於男子老人尪羸不能久待婦人領粥出自萬不得已俱宜體卹來卽發之一童子最難馴伏須擇人官攝擊鑼爲號五童一隊挨

次散之壯男俟末後散之

一丐流另設粥場仍令丐頭管領毋使混擾飢民

一凡遠近有體而人如學究醫生之類以絕粒爲苦而

又難于到廠當給竹籌烙鐵印記卽托人代領不必

親至

一道路橋梁有缺壞毀腐者皆補築修理勿使飢病之

人傾跌致斃宜周密預爲之

一粥之生熟厚薄有無插和監視者當親看親嘗則諸弊悉除飢民得沾實惠

一煮粥須用磚竈一則耐久一少灰塵

附錄周撫院諱孔教救荒條諭

民閒之積貯有限而商賈之通濟無窮商賈來則穀米多穀米多則米價自平故疏通商賈尤爲救荒急務本院心切濟民先切通商各屬有司其價隨時高下聽商民從便交易務使商民兩得其平

每見荒年一番僉報闔邑騷然姦民乘之攘臂而起致令富家巨室人人自危今本院捐俸爲首以及次道府州縣倘鄉紳先生慷慨仗義行仁者聽其自書若

于不願者不强也至于任俠慕義如顧正心者三吳  
豈謂無人儻有捐數萬金救民者本院卽爲題旌萬  
金而下豎坊給扁俱無所吝欲冠帶者給冠帶以榮  
終身欲效用者給劄付以令效用又爲之免其重役  
卽如輸米百五十石者免五百畝之差三年輸米三  
百石者免千畝之差三年米遞加田亦遞免俱聽其  
自書有司不得一毫強勒近清浦縣候選序班王仕  
捐資五百兩助賑吳縣監生朱國賓措銀千兩助糴  
卽令縣官親往其家縣扁以旌之仍免三年重役使

得爲善之報本院之不食言如此夫請蠲請賑禁搶  
奪禁強借本院之保護富家不遺餘力儻富家終吝  
一錢不出無論辜負本院且非自爲身家計也

議荒政而及於鳩工其無煩官帑有益大戶而兼可以  
濟貧民者無如修圩一事蓋圩埂日塌僅存一線所  
以一遇大水捍禦無策今誠及八九月水退之時縣  
官輕舟寡從徧至窮鄉每圩之中有田而稍饒者計  
畝出米若干有田而家貧者計畝出力若干卽以饒  
者之米充貧者之腹使之畢力修築狹者培之低者

增之有數千畝共一圩者仍界畫爲數圩而多築埂以分之夫埂厚而高則禦水有具圩分而小則車戽可施在出米者非置之無用之地在出力者卽自爲已田之謀且可以目前救荒之謀爲後來備荒之用其地非水鄉無圩可修或繕治城池或平治橋道或營建官廩大都動千人之工則活千人動萬人之工則活萬人但須於富民不擾於飢民得濟此又救荒一端也

本院因此年歲凶荒苦心竭力凡可救活百姓不愛髮膚如請蠲請賑積米平糶等項不一而足爾等宜仰體本院真意若好勇疾貧乘機搶奪如奸徒盧文獻羅二高二等已經拏解前來縛押遊示六門畢卽斃之通衢訖夫各犯搶人糧米本以倖生反以速死此等奸徒在在有之若不及早改行本院決不姑息治亂民正以安良民爲此諭軍民人等務農者趁此水退隨便耕種雜糧蔬菜亦可餬口經營者肩挑步担傭工超食亦可活命各安生理省儉度日未必卽死若怙終不悛如盧文獻等頃刻立斃屍骸暴露誰爲

憐惜爾等思之速速改過毋蹈覆轍



國家圖書館, NATIONAL CENTRAL LIBRARY, TAIWAN, R.O.C.